
ФАРҒОНАЛИКЛАР ҲАШАРДА ФАОЛ ИШТИРОК ЭТДИ

Ўзбекистон Республикаси Вазирлар Маҳкамасининг «Обод юрт» умумхалқ ободонлаштириш ва кўкаламзорлаштириш хайрия ҳашари акциясини ўтказиш тўғрисидаги фармойишига асосан умумхалқ ҳашари Фарғона вилоятида ҳам ҳамюртларимизнинг фаоллиги ва уюшқоқлиги билан ўтди.

Эрта тонгданоқ вилоят аҳли кўтаринки кайфият, ўзгача шукуҳ билан ишга киришди. Хонадонлар, корхона-муассасалар бино-иншоотлари ён атрофини супуриб-сидиришдан бошланган умумхалқ хайрия ҳашари кенг қулоч ёйди. Жойларда мавжуд ер майдонлари чопилди, дарахтларга шакл берилди ва оқланди, ички ариқлар тартибга келтирилди, ҳудудлар ахлат-чиқиндилардан тозаланди ва махсус автомашиналарда махсус жойларга олиб чиқиб ташланди. Ишлаб чиқариш жараёнидаги вилоятдошларимиз эса ҳар доимгидан кўра янада унум билан меҳнат қилдилар.

- Заводимиз раҳбарлари ва ишчи-хизматчиларининг ташаббуси билан корхона яқин атрофдаги кўчаларни, Қиргули мавзеидаги хиёбонларни ҳамда Фарғона шаҳрининг Мустақиллик шаҳарчасидаги кўп қаватли уйлар атрофини тартибга келтириш, ободонлаштириш, ерларни юмшатиш, ахлат ва чиқиндилардан тозалаш ишларида қатнашдик, - дейди Фарғона нефтни қайта ишлаш заводи директори ўринбосари Б.Мўминов. - Икки кун давомида 4 минг 358 нафар нефтчиларнинг кучи билан Қирғулида яратилган интенсив боғда ҳам ташкил этилган ҳашарда миллий қадриятларимиз ўз аксини топди.

Вилоятимизнинг барча шаҳар ва туманларида, маҳаллалари аҳоли яшаш жойларида, ташкилот-муассасаларда, ўқув юртларида, хиёбонлар, зиёратгоҳлар ва қабристонларда ташкил этилган умумхалқ хайрия ҳашари уюшқоқлик билан ўтди. Бунинг акцияда 2 миллион 600 минг нафарга яқин юртдошларимиз фаол иштирокидан ҳам билиш мумкин. Хайрли ва эзгу ишларда, айниқса, ёш авлод вакиллари алоҳида намуна кўрсатдилар.

Умумхалқ хайрия ҳашарини ўтказиш штаби маълумотиغا кўра, икки кун давомида вилоятимиз ҳашарчиларнинг ғайрат-шижоати билан 3 минг 600 гектар майдон ободонлаштирилди, 1 минг 500 километр узунликдаги ариқ-зовурлар тозаланди, 114 та зиёратгоҳ ва қадамжолар, 947 та қабристонлар тартибга келтирилди, жойларда 2 миллион 980 минг тупдан зиёд мевали ва манзарали дарахт кўчатлари ўтқазилди.

Ҳашар йўли билан 1 минг 400 га яқин кам таъминланган, яқка-ёлғиз, боқувчисини йўқотган нуронийлар ҳолидан хабар олиниб, уларнинг 213,7 минг метр-квадрат уй-жойлари беминнат таъмирлаб берилди. Ҳимматли инсонлар 2 минг 500 дан зиёд эҳтиёжманд оилаларга саҳоват амалларини дариғ тутмадилар.

Шунингдек, ҳашар кунлари арафасида вилоятимизда 3 та маҳалла фуқаролар йиғини биноси, 2 та тиббиёт клиникаси, 5 та мактабгача таълим муассасаси, 2 та меҳмонхона, 3 та тантаналар уйи, 1 та савдо мажмуаси, 25 та маиший хизмат кўрсатиш шохобчаси, гўзаллик салони, савдо дўкони, қаҳвахона фойдаланишга топширилди.

Халқнинг биргалашиб, баҳамжиҳат ва бир мақсадни кўзлаб энг шимаргани миллий қадриятларимиз бардавомлиги яна бир бор намоён этди.

Фарғона вилояти ҳокимлиги Ахборот хизмати

Facebook, Telegram, Веб сайт, YouTube

2020-03-16 12:05:48